

CUSSEGL GROND

Sessiun da zercladur 2023

Dumonda Crameri concernent animals da rapina gronds: segirezza da la populaziun

La fin da l'onn 2022 han ins dumbrà almain 94 lufs en il chantun Grischun e confermà diesch trieps sin il territori chantunal. Il medem onn han animals da rapina gronds stgarpà 517 animals da niz, quai ch'è ina duplicaziun cumpareglià cun l'onn precedent (242). En la sessiun da favrer 2023 ha la cussegliera guvernativa Carmelia Maissen explitgà, ch'il dumber da lufs s'augmentia cuntinuadamain en il Grischun e che la populaziun da lufs sa chattia anc adina en la fasa da la creschientscha esponenziala (PCG sessiun da favrer 2023, p. 684 s.). Perquai ston ins partir dal fatg, ch'il dumber d'animals da niz stgarpads vegnia a s'augmentar vinavant, nun che la revisiun da la Lescha e da l'Ordinaziun da chatscha da la Confederaziun mussia finalmain ses effect. Pervia da l'augment dal dumber d'animals da rapina gronds en il chantun Grischun èn l'agricultura sco er l'economia d'alp confruntadas cun sfidas massivas, cun custs supplementars considerabels e cun intschertezzas. Pli e pli vegn er il turissem sut squitsch. Persunas indigenas, giasts sco er visitadras e visitaders na sa sentan betg pli segirs. Ina periclitaziun da persunas tras animals da rapina gronds na po betg vegnir esclusa. Ins sto quintar dapertut e da tut temp cun inscuters privlus, cunzunt la saira ed ordaiifer las vias e sendas. Sendas da viandar ston vegnir clausas u serradas; in'excursiun u ina spassegiada la saira vul esser bain ponderada. Da l'exteriur èn enconuschents differents rapports davart inscuters privlus cun animals da rapina gronds. Ins sto temair, ch'i vegnia a dar tals incidents er tar nus.

En vista a quests fatgs sa tschentan las suandantas dumondas:

1. Co stuess la problematica dals animals da rapina gronds vegnir prendida per mauns ord vista da la Regenza?
2. Ha la Regenza enconuschientschas d'attatgas u d'avischinaziuns d'animals da rapina gronds a persunas?
3. Tge mesiras ha la Regenza l'intenziun da prender per proteger la populaziun?
4. Exista in concept da protecciun per la populaziun u èsi previs d'elavurar in tal?
5. Tgi surpiglia la responsabladad, sch'il luf attatga umans, e tgi surpiglia la responsabladad, sche animals da rapina gronds na pon betg vegnir eruids sco auturs dal donn, per exempel en cas nua che muntaneras èn ruttas ora u fugidas?

Claustra, ils 15 da zercladur 2023

Crameri, Butzerin, Roffler, Adank, Altmann, Beeli, Berther, Bettinaglio, Binkert, Brandenburger, Brunold, Bundi, Candrian, Casutt, Cola Casaulta, Collenberg, Cortesi, Della Cà, Derungs, Dürler, Epp, Föhn, Furger, Gansner, Gort, Grass, Hartmann, Jochum, Kienz, Kocher, Kohler, Krättli, Lamprecht, Lehner, Loepfe, Loi, Luzio, Mani, Menghini-Inauen, Messmer-Blumer, Metzger, Michael Beni (Donat), Righetti, Salis, Sax, Sgier, Spagnolatti, Stocker, Tomaschett, Ulber, von Tschärner, Widmer, Wieland, Zanetti (Sent)